

AKASHVANI AIZAWL
REGIONAL NEWS UNIT

ASF

Kuminah vawk pul hri, African Swine Fever avangin vawk 7,027 a thi tawh.

AH & Vety Department hotute chuan Akashvani zawhna chhangin ASF avanga vawk thi leh suat chu a awm ve reng thu sawiin pung hluai chuang loin a khat tawkin a awm ve reng tih an sawi a. Nimin khan ASF avangin vawk 74 a thih thu leh vawk 18 suat a nih thu an sawi a. Hetihian kumina ASF avanga vawk thi chu 7027 a nih thu leh ASF avanga an suat tawh zat chu 2709 a nih thu an sawi a ni.

AH & Vety department hotute hnen atanga thudawn danin ASF hi Mizoram chhunga district pasarih Mamit, Lawngtlai, Siaha, Lunglei, Khawzawl, Champhai leh Hnahthialah te a leng mek a. Heng district-a khaw 115 ah hri hi a leng mek a ni.

VC of Vanlalruata

Vawk pul hri kan tih, African Swine Fever hi kumin chhungin Mizorama district pasariha khaw 115-ah te a darh tawh a. Siaha district a tibuai nasa ber a, an district chhunga khaw 38-ah ASF hi a leng a. Lunglei district-ah khaw 30, Lawngtlai district-ah khaw 18, Khawzawl district-ah khaw 12, Hnahthial district-ah khaw 8, Champhai district-ah khawl 5 leh Mamit districtah khaw 4-ah te a leng mek a. AH&Vety dept. hotute chuan ASF hi State dangah chuan nitin nuna a awm reng chunga khawsakpui thiam mai lam zawngte pawhin rilru an pu tawh an ti a. Tun hnaiah a pung hluai lem lo na a, a case hi a awm ve reng tih an sawi a ni.



COVID

Mizorama Covid 19 hri kai chu tukin khan mi 15 an ni a, heng mi 15 te hi Aizawl district mi vek an ni.

Health department hotute chuan Akashvani zawhna chhangin heng Covid hri kai te hi enkawl mek an nih thu leh ngaihtuahawm an awm loh thu an sawi a. Kumin hian May thla laihawlah khan Covid hri kai hi hmuhchhuah leh a ni a, endik loh avanga hmuhchhuah loh tam tak an awm rin a ni.

Akashvani thudawn hnuhnung berah chuan kum 2020 bul lama Mizorama Covid lo luh atangin sample nuai 19, sing 9, sang 7 leh 863 endik a ni tawh a. An zinga nuai 2, sing 3, sang 9 leh 654 te chuan Covid an kai tih hmuhchhuah a ni a. Covid hri kai zingah a vaiin mi 734 an thi a ni.



ROSIAMNGHETA PRESS CONFERENCE

Aizawl Municipal Corporation Ward V Corporator Pu Rosiamngheta chuan an ward chhung mipuite nihphung hriatna tur Know Your Citizen (KYC) software an siam thu leh hemi hmang hian ward chhung mipuite nihphung lakkhawm nghal a nih dawn thu a sawi.

Vawiina Aizawl Press Club-a chanchinbumite a kawmnaah he thu sawiin Pu Rosiamngheta chuan khawvelah ram hmasawn leh changkang apiangin Data an ulukin an neih chikim thin thu leh an khua leh tuite an chhinchhiah fel thlap thin thu a sawi a. Hei hi hmasawna pawimawh tak a nih thu leh, data tha leh chhinchhiahna mumal neih a pawimawh hle tih a sawi a. Heng Data pawimawhna hi hriain Ward No V Committee chuan ngun taka a ngaihtuah hnuah ward chhunga hman turin Know your Citizen tih software chu siamin hman a rem ti tih a sawi a ni.

Byte of Rosiamngheta...

Pu Rosiamngheta chuan an software chu a la kimchang lo hle tih sawiin hmabak la awm pawh kawng hrang hranga tih hmasawn ngai a nih thu leh tunah rih chuan a bul tanna ang chauh a la nih dawn thu a sawi a. Software ah hian Ward chhunga veng hrang hrang mipuite nihphung pawimawh zualpui chu dah luh tum a nih thu sawiin hei hi Local council ten tul an tihnaah khua leh tuite mamawhna ah an hman dawn thu leh vantlang luhchhuah nuai nuai thei a siam a phalrai tur erawh a nih loh thu a sawi a ni.

Software chu khawtlang chhiarpui anga sawi theih niin kum bithliah, thiamna, eizawna, House No, Phone No, Epic No Section leh thil hrang hrangte pawh a awm nghal vek dawn thu a sawi a. Pem lehkha issue thlengin leh an pemna thleng a hriat zui theih turin a dahtha dawn tih a sawi a. Thisual ti te chhuina, Criminology atan pawh thil pawimawh tak a ni chho tura a ngaih thu a sawi a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Zanin dar 6 leh a chanve-ah Chanchinthar puan leh a ni ang.



PM KISAN SAMMAN NIDHI

Prime Minister Pu Narendra Modi kaihhruaina hnuia kuthnathawktute tuam hlawn Scheme pui ber PM KISAN hnuia hamthatna pawisa dawng thei tur semchhuah bultanna chu ramchhung hmun dangte rualin Mizoramah buatsaih a ni.

He Scheme hi kum 2019 atanga bul tan niin, tun tuma a sem chhuah hi a vawi 20 na a ni a, PM KISAN hi khawvel a kuthnathawktute hamthatna tur DBT hmang Digital Marvel lian ber a ni a, he scheme-a in ziaklut te chuan thla li danah cheng 2000/- zelin kum khatah cheng 6000/- an Account ah Direct Benefit Transfer (BDT) hmangin an dawng thin a ni.



LIANPUI YMA

Champhai District a Lianpui khuaa Branch YMA member te chuan nimin khan chhiat an tawh avanga thlawhhma kawng zawh mumal thei lo, Pu Zamdingliana, Pu Hrilthanga fapa te chhungkaw thlawhhma, buh hmun tin khat vel chinna leh Sawhthing quintal 3 vel chinna chu an thlawh zawh sak a, Chawhnu lamah Tv Lalliansanga thlawh hma pawh an thlawh zawh sak nghal a ni.

Pu Zamdingliana hi kumin July ni 22 khan a nupui Lalnunnemi chuan a thih san a, a fa naupang 2 - kum 9 mi leh kum 3 mite chu ramah riahpuiin a thlawhhma hi a enkawl tha thei meuh lova, Lianpui branch YMA Member 56 hnatlanga thawk chhuak ten Tiau lui kam, Chithar rama a thlawhma, Lianpui khua atanga KM 9 vela hla a mi chu nimin khan an thlawh zawh sak ta a ni.

